

ESAF Zug vom 23.8. bis 25.8.2019

Erst nu simmer nervös gsi und voller Nügger uf das Fest. Laufft echt alles guet?? Hemmer üs gfraget.

So isch denn s erste Grüppli am Samstag am 10. August i de Gabebeiz gu helfe.

Me hed gmerkt au da gids nu s einte oder andere wo nu nid klappet.

Au am Sonntag am 11. August stönd vier Fraue vo üs im Isatz und tüend am Schluss nu Bsteck i packe, bis eine chund gu mekere, und d' Maria tued packe iri Sache. Sisich halt wenn jede meint er sig de Chef. Au d' Rosa setzt sich i, dass mier es warms Menue überchömid als Verpflegig, und so hed sich denn alles zum Guete erledigt.

Ja es hed sichtlich Spass gmacht am daruf folgende Samstag Sonntag und Mändig. Globt hend üs Gäst dass mir so speditiv sind und nid machid e suure Stei, so simmer vo de Gabebeiz zfride hei.

Am Haupt Tag am 25. August früh am Morge am Füfi, hend mir packt üses Zweirad Güfi und sind gradlet de Lorze entlang zu de Schwinger Arena

Üsi Hilf heds brucht im Verpflegis Stand D bi de Berner Tribüne und so heds gheisse - uf fülle Vorbereite – grilliere und vor allem Nachschub bringe. Es isch grad chle öpis gloffe bi so viel Schwingerfründe, und s eint und ander isch nüme gsi im Kühlwage z'gfinde.

Chle länger als vorgseh hemer chrampfet und vo allne Site Lob und Zfriedeheit tanked.

Schön isches gsi, en Teil vo dem riese schöne Fest dörfe als Champfer debi zsi, wie gaht die Zit eso au schnell verbi, und s Volk und s ganze OK hed es grosses Lob a üs Champfer us gsproche, nur schaad hed de Stucki de Wicki is Sagmehl bettet.

De Kolin (Stier) bleibt defür im Zugerland und de Bieri Marcel holt de erst Kranz und isch ab jetzt au en Eidgenoss.

Danke alle wo sich isetzt hend i de Gabebeiz und au am Grosse Fest,

es isch gmüetlich, intensiv, hervorragend, emotional und eifach gsi GENIAL. BRAVO